

Ka tae mai ano ia ki Nepia i roto i nga ra o Tihema nei, otira tera e rokohanga mai e ia he maha nga whakaware mona e roaroa atu ai tona korenga e kitea mai ki tenei wahi.

Ka nui te ngahau o to tatou huihuinga mai inaianei ki tenei kainga whakanoho hou. Kotahi rawa te he, ko te kore tangata mai o Te Kaha; otira, e taea pea tena te whakaaro akuanei e te Hui.

Ki te tiro-tirohia e tatou nga mea o tenei tau ka taha ake nei, he maha nga mea e kitea hei whakawhetainga ma tatou ki te Atua. Tetahi, ko te Whare-karakia o Whakato, i kiia ra i mua kia hangaa houtia hei whakamaumahara ki te Pihopa tuatahi o tenei Pihopatanga, kua timataia nei te hanga i roto i enei ra kua pahure ake nei. Tetahi ko tenei whare e noho nei tatou inaianei. He mea enei no waho, otira e kore e kiia he mea tikanga-kore ki te waiho hei mea e neke ake ai te Hahi a Te Karaiti hei whare tapu mo te Atua: ko tenei hoki ta tatou e whai ai hei tutukitanga mo a tatou mahi i nga wa katoa. Tenei tonu hoki te hoariri te mahi nei i ana mahi. E whakawaia ana e ia te tangata ki te karakia pohehe, muri iho ka meatia e ia aua karakia hei whakaoho i te ngakau whakatakariri, tupu tonu ake hei raruraru ki roto ki a tatou. Ko te pehi ma tatou i nga mahi pera, kauaka e pa te ringaringa, engari me ata korero marire. Ma te kupu aroha te tangata e kukume mai ka hoki mai ai ki te huarahi tika. Tenei te korerotia nei te hiahia o etahi o nga iwi o te tai whakararo nei ki te whakarere i a ratou karakia pohehe i titoa nei e te tangata, kia hoki mai ai ki te Hahi a Te Karaiti. Me whakakaha e tatou tenei hiahia me te puta ano a tatou inoi mo ratou, kia whakamaramatia o ratou kanohi e Te Karaiti, kia whakatikaia hoki o ratou waewae ki te huarahi o te rangimarie.

Kia puta ano o tatou uaua ki te whakatikatika i nga mea e hapa ana i roto i a tatou. Tetahi mea nui hei maharaharatanga ma tatou, ko a tatou tamariki. E kura tonu ana ratou ki nga kura a te Kawanatanga, ko te taha anake ia ki te tinana, ki nga mea o te ao; tena ko te taha ki te wairua, ki nga tino mea e ora ai te tangata, kahore ano kia ata whakaaroa. No nga tangata katoa o te Hahi tenei mate, ehara i te mea no nga Minita anake; e kore hoki e taea e te Minita ki te kore e whakatika mai etahi o te iwi hei mahi, ara hei whakaako i nga tamariki.

Tetahi mea e kitea ai te ora o te Hahi, ko te haere o te tangata ki te kawae i te Rongopai ki etahi wahi. Kua puta ano tenei mea i te Pihopa i ana whai-korero ki te Hui i enei tau kua pahure ake nei; otira kahore ano tetahi tangata Maori o Niu Tirani kia tae ki nga motu o nga tauwiwi kauwhau ai i te Rongopai. Tenei te tuhituhia mai nei nga korero o etahi o nga motu e mahia nei e Te Herewini, Pihopa ratou ko ona hoa; he reo Maori nei te reo o etahi. Me te mea he karanga mai tenei ki nga tangata Maori o Niu Tirani kia uru atu ki taua mahi. Ko